

DEN AMBIENTE

Artistanan local a salba e show di Gali Galiano...

Fotos/Texto: Jan Poets



****** Un señor di show e formidable duo aki Yolanda y Marcelino a sa di brinda e publico..

****** E organizadornan di e show di Gali Galiano mester gradici e artistanan local cu a presenta como apertura di e show di Gali Galiano, pasobra sin duda algun ta nan a resulta como e atraccion di e anochi, envez di Gali Galiano. Si no tabata pa e tremendisimo presentacion di nos artistanan, e anochi di Gali Galiano lo a finaliza den un desaster. For di tempran caba a surgi un desgusto total serca e publico cu a bin na grandi pa e anochi aki y mester a para den fila te banda di Benihana pa hopi rato. Na momento cu porfin nan a logra di drenta den City One, nan a haya e sorpresa di nan bida cu nan mester a sinta tur di prop riba otro pa e suma di 100 y 50 florin. Riba dje tabata haci hopi calor y e show no tabata tin fin pa cuminsa, debi cu ainda e equipo di sonido no tabata completamente instala. Mientrastanto cu un publico histerico tabata grita pa cuminsa cu e show. Despues di basta rato, porfin e MC di anochi Nilca Franka a pidi disculpa y pa colmo, e cu no tabata tin arte ni parti di e culpa, mester a soporta e gritonan di protesta. Nilca Franka no a perde control y a sa di calma e publico un poco utilizando su diplomacia como un bon MC. Despues cu Nilca a introduci Mariachi Perla di Aruba, e tension di e publico a cuminsa suavisa. Despues cu Mariachi Perla di Aruba a cuminsa resona algun numero-



Pa colmo e outfitt di Gali Galiano tabata chapo.

nan como prueba di sonido, porfin tur cos tabata cla pa e elenco local subi riba escenario. Cada un di e cantantenan aki; Yolanda v/d Linde, Marcelino Paesch, Roland v/d Linde, e dos jovennan Edward v/d Biezen y Sherida Paesch, a sa di duna e publico un fabuloso show hamas visto. Un publico hopi agradecido tabata respalda nos artistanan cu aplausonan sin fin y cu gritonan di apoyo, cual a pone tur hende lubida un rato e mal experiencia di nan yegada. Un señor di show e duo Yolanda y Marcelino a sa di brinda e publico den un forma comico riba un potpori bon esochi cu tabata papia e

palabranan cla, pa cual nan kier a trece pa dilanti. Despues cu e publico a goza inmensamente di e tremendo show di nos artistanan, a yega e turno pa Gali Galiano subi riba escenario acompaña pa su grupo di mariachi, cu pa colmo tambe a tuma mucho tempo. Mucho cos DEN AMBIENTE no por bisa di Gali Galiano, debi cu ta riba dos hit so e la drei su anochi, cualnan tabata "Me Bebe Tu Recuerdo" y "La Distancia". Esakinan tabata e unico dos hitnan cu Gali Galiano a sa di gara e publico. Prome cu el a clausura su show, ya basta hende a bandona City One..



****** "El Charro Arubano" Roland Angela riba demanda di e publico mester bolbe subi riba escenario pa interpreta algun numero mas..



****** E joven Edward v/d Biezen cu e cancion "Doño y Esclavo" a sa di cautiva e publico..



****** E jovencita Sherida Paesch yiu di e duo Yolanda y Marcelino Paesch, a conquista curasonan di un i tur y hasta a ricibi un standing ovation. Riba demanda di e publico e mester a ripiti e cancion "Los Laureles", cual el a sa di interpreta den un forma impresionante..